

**Meeqqat napparsimanerata ulluanut siullermut pisinnaatitaaffiup annertusarnissaannut periarfissat pillugit kiisalu meeqqami napparsimasup angerlarsimaffimmi paarinissaanut angajoqqaanut pitsaanerusumik periarfissiisumik ataqatigiinnerusumik aaqqiinerup pilersinnissaanut Naalakkersuisut nalunaarusiamik suliaqarnissamik peqquneqarnissaat pillugu Inatsisartunut aalajangiivigisassatut siunnersuut. Suliffeqarnermut peqataasut peqatigalugit oqaloqatigiinnertigut aammalu tamatumunnga peqatigitillugu periarfissani assigiinngitsuni aningaasaqarnermut aamma allaffissornermut kingunerisa qulaajarneqarnerisigut nalunaarusiaq suliarineqassaaq. (Inatsisartunut Ilaasortaq Pipaluk Olsen, Demokraatit)**

### **Akissuteqaat**

(Isumaginninnermut, Suliffeqarnermut, Ilaqutariinnut Nunamullu Namminermut Naalakkersuisoq)

### **Aappassaaneerpeqarnera**

Meeqqat napparsimanerannut atatillugu paarsinissamut aamma isumassuinnissamut sinaakkutit pillugit siunnersuummik oqaluuserinninnermut Naalakkersuisunit Inatsisartunut qujassuteqarnissaq kissaatigineqarpoq.

Ataatsimiititaliami amerlanerussuteqarfiusumik siunnersuummik akuersissuteqarnissaq innersuunneqarsimammat, iluarinnittumik maluginiarneqarpoq. Tamatumunnga peqatigitillugu meeqqat napparsimanerini paarinissaannut aamma isumassornissaannut atatillugu sinaakkutit aamma pissutsit eqqortut qulakkeerneqarnissaat Kalaallit Nunaanni meeqqanut aamma ilaqutariinnut aalajangiisuuneranik ataatsimiititaliap erseqqissaanera pingaartinneqarpoq.

Suut tamaasa isigalugit, suliassaqarfimmit meeqqat aamma ilaqutariit, ulluunerani paaqqinnittarfiit kiisalu suliffeqarnermi peqataasut attugaammata, ataatsimiititaliamit erseqqissaatigineqarpoq. Tamatumunnga atatillugu, naapertuuttumik oqimaaqatigisitsisumik qulakkeeraluni, tulluurtunik, siunertamut naapertuuttunik aammalu piviusorsioortunik, aaqqiinernik suliaqartoqarnissaa, aammalu suliap ingerlaqqinnissaanut tunngavissamik qajannaatsumik pilersitsinissaq pingaaruteqarpoq.

Aammattaaq aaqqiinissatut periarfissiarineqartut Kalaallit Nunaanni inuiaqatigiinnut kingunissaasa takoriaannaatinneqarnissaat kiisalu suliffeqarnermi peqataasut qanimut oqaloqatigalugit aaqqiinerit ineriartortinneqarnissaat ataatsimiititaliap kissaatigigaa pingaartinneqarpoq.

Suliap naammassisarneqarnissaa aammalu suliassaqarfimmi ingerlaqqittumik ineriartuutaasumik oqaloqatigiittarnissat Naalakkersuisunit qilanaarineqarput.